




DS

735

A2W8

19--

V. 47



御撰資治通鑑綱目三編卷十四

起癸丑明世宗嘉靖三十二年
凡二十年
年盡壬申明穆宗隆慶六年

三十二年春正月朔日食不見。○秋七月俺答大舉入寇

初叛人趙全邢富等以罪亡入虜招集亡命居豐州築城自衛構宮殿墾水田號曰板升板升華言屋也全等數誘虜入寇教以製鉤杆攻城堡之法俺答信用之至是復大舉深入下渾源靈邱廣昌急攻插箭浮圖等峪遊擊陳鳳力戰却之虜分兵東犯蔚西掠代繁時駐蹕延二十日屠掠延慶諸城幾遍會久雨乃去未幾復以萬騎寇大同總兵李淶戰死全軍皆沒明年復犯宣大攻薊鎮牆百道並進警報日數十至京師戒嚴薊遼總

督楊博悉力禦之乃遁。

九月柘城盜作亂官軍討平之。

柘城人師尚詔結劇盜數千薄歸德城其黨啓門納之劫獄囚掠帑藏去官軍分道追賊獲尚詔於山東詔卽所在斬之賊起四十餘日破府一州二縣八屠戮十餘萬人三省皆震。

三十三年春正月朔杖六科給事中於廷。

以科臣賀表違制盡予杖。

夏五月命張經總督江南浙江軍務討倭。○秋七月詔勦戚大臣入直西內。

命駙馬都尉鄔景和安平伯方承裕尚書李默王用賓

左都督陸炳入直西內侍郎程文德閔如霖郭樸吳
供撰青詞景和以不諳元理辭帝不悅罷其入直已而
賚在直諸臣景和與焉景和辭免且言臣願得洗心滌
慮効馬革裹尸之報帝怒其怨訕黜爲民。

三十四年春二月遣趙文華督視海防。

文華誦事嚴嵩結爲父子自通政使進工部侍郎東南
倭患棘文華請遣大臣祭東海帝卽命文華往兼督察
軍情文華恃寵恣睢百司震懼公私財賂填集江南爲
之困敝又牽制兵機顛倒功罪雖徵兵半天下而倭勢
愈熾。

冬十月殺總督尚書張經。

初文華屢趣經進兵。經恐洩師期，不以告文華。怒劾經養寇失機，疏方上。經大破倭於王江涇。文華攘其功，謂已與巡按胡宗憲督師所致。嚴嵩復從中搆之。遂逮經下獄。經疏言：「臣任總督半載，前後俘斬五千，乞賜原宥，不納。」至是，斬西市，天下冤之。

殺兵部員外郎楊繼盛。

帝既罷馬市，乃思繼盛言。自典史四遷復為員外郎。繼盛甫抵任，即上疏劾嚴嵩。略曰：「祖宗罷丞相，設閣臣備顧問，視制草而已。嵩儼然以丞相自居，竊弄威柄，黜陟由已。百官奔走請命，直房如市。令其子世蕃代票擬京師有大丞相小丞相之謠。嚴効忠，嚴鵠乳臭子耳。未嘗

一涉行伍皆冒軍功官錦衣以故兩廣將帥躡掌府部
逆鸞下獄賄世蕃三千金嵩卽薦爲大將北虜深入戒
丁汝襲勿戰生靈塗炭畿輔爲墟郎中徐學詩給事中
厲汝進等一與牴牾立加斥謫文武遷擢苞苴肆行將
弁惟賄嵩不得不腴削士卒有司惟賄嵩不得不掊克
百姓守法度者爲迂拙工附離者爲才能風俗澆訛廉
恥漸滅嵩罪如此而其姦又足以濟之厚賄左右得備
聞宮中言動用趙文華掌通政使疏至必先閱副封畏
廠衛緝訪卽與結姻懼言官彈劾非私人不得預臺諫
部寺中有才望者悉羅致門下內外聯絡根柢蟠互諸
臣忍負國不敢忤嵩惟陛下察其姦邪或召問裕景二

主或詢諸閣臣重則置憲輕則罷免內賊旣去外賊不戰而自戢矣疏入高摘召問二王語密構於帝下繼盛詔獄備極慘酷論死繫二載會張經李天寵坐大辟嵩揣帝意必殺一人因附繼盛名並奏繼盛妻張氏上書請代夫死詞極哀痛嵩屏不上遂斬西市臨刑賦詩曰浩氣還太虛丹心照千古生平未報恩留作忠魂補天

下涕泣傳誦之

十一月朔日食○山西陝西河南地震

聲如雷鷄犬鳴吠陝西渭南華州朝邑三原等處山西蒲州諸處尤甚或地裂泉湧中有魚物或城郭廬舍陷入地中或平地突成山阜河渭溢華岳終南山鳴河清

數日壓死官吏軍民八十三萬有奇

三十五年春三月以趙文華爲工部尚書胡宗憲總督軍務

前年秋倭衆六十餘人自杭州西剿嚴撤寧國太平直犯南京出秣陵關劫溧陽宜興抵無錫趨許墅轉鬪數千里殺傷幾四千人歷八守餘日始爲官軍所殲應天巡撫曹邦輔以捷聞文華忌其功大集浙直兵與宗憲親將之搗倭於松江之陶宅進營甌橋倭悉銳來衝大敗文華氣奪乃定計招撫以寇息請還許之比還朝倭警日至帝數詰嚴嵩嵩曲爲解帝意終不釋會吏部尚書李默發策試選人中言漢武征四夷而海內虛耗唐

宗攻淮蔡而晚業不終文華劾其誹謗默坐死帝以是
謂文華忠進尚書加太子太保文華盛毀總督楊宜而
薦宗憲遂擢宗憲兵部侍郎總督諸軍討倭

夏五月復遣趙文華視師

倭警還至部議再遣大臣督師已命兵部侍郎沈良材
矣嵩令文華自請行且言江南人矯首望文華帝信之
命兼右副都御史提督軍務既而宗憲俘陳東平徐海
文華以大捷聞歸功上元帝喜加文華少保廕子錦衣
千戶

秋九月徽王載堉有罪廢爲庶人自殺

載堉性淫虐奪民間女爲妾發塚七十餘所前後殺無

幸二十餘人恐得罪。乃密置驛騎伺京師動靜。無按交章論奏。詔廢爲庶人。載塿殺其妻妾。自縊死。

冬十月朔日食。

三十六年夏四月。奉天華蓋謹身三殿災。

帝下詔引咎。修齋五日。止諸司封事。

秋九月。趙文華有罪免。其子懌思戍邊。

帝急欲建正朝門樓。文華猝不能辦。帝不懌。且聞其視師江南。黷貨要功狀。思逐之。嚴嵩言。文華因觸暑南征。疾尚未愈。隨令上章稱疾。帝手批令回籍休養。制下。舉朝稱賀。其子錦衣千戶懌思。以齋祀停封章。且請假送父。帝怒。黜文華爲民戍懌思邊衛。

後前錦衣領經歷沈鍊。

鍊既至保安。未有館舍。賈人某詢知其得罪。故空家舍授之。里長老亦日致薪米。遣子弟就學。鍊語以忠義。大節皆大喜。塞外人素慙直。又稔知嵩惡。爭冒嵩以快鍊。且縛草爲人象。李林甫。秦檜及嵩。醉則聚子弟攢射之。或踴騎居庸關口。南向戟手。冒嵩痛哭而歸。語稍稍聞。京師皆大恨路楷。巡按宣府。世蕃屬與總督楊順合圖之。兩人日夜謀中鍊。會蔚州獲妖人閻浩。詞所連甚衆。順喜。謂楷曰。是足以報嚴公子矣。竄鍊名其中。上之。遂斬宣府市。戊子。襲極邊。子順一子錦衣千戶。楷待銓。五品順曰。嚴公薄我賞。意豈未愜乎。併取鍊子襄。襲杖殺。

之。

冬十一月辛愛圍大同右衛。

俺答子辛愛有妾曰桃松寨。私部曰懼罪來降。楊順自謂爲奇功。致之京師。辛愛來索。不得。寇應朔二州毀七十餘堡。縱掠大同圍右衛。數匝順懼。乃詭言敵欲以叛人趙全等來易桃松寨。廷議許之。敵狎知順無能。圍右衛益急。更分兵犯宣薊。西鄙震動。嚴嵩與兵部尚書許論計。欲棄右衛。帝不聽。召順還。以兵部侍郎江東代之。時故將尚表以餽餉入圍城。悉力捍禦。時出兵突戰。虜酋三人會江東與總兵張永勲等各嚴兵進圍。乃解。胡宗憲誘降海盜汪直。誅之。

直糾衆三千餘入寧波岑港大掠宗憲故與直同鄉因館其母妻於杭州厚撫之遣使招直直詣降願効死自贖帝謂直元兇不可赦乃收斬之其黨復據岑港堅守逾年徐移之柯梅宗憲利其去不追賊遂揚帆而南流劫閩廣

三十七年秋八月吉能圍甘州

吉囊子吉能犯永昌涼州進圍甘州十四日始退土蠻亦數寇遼東

冬十月禮部進瑞芝

先是詔有司採芝五岳及諸名山至是禮部進二千八百六十本詔廣求徑尺以上者

三十八年春二月辛愛寇灤河

辛愛與老把都諸部謀大舉入犯屯會州聲言東下薊遼總督王忬不能察遽引兵而東號令數易虜乘間入潘家口渡灤河而西大掠遵化遷安薊州玉田駐內地五日京師大震御史王漸方輅交章劾忬遂逮忬下詔獄論死

秋七月南京地震

三十九年春正月以鄆懋卿總理鹽政

舊制無一人總理四運司者至是懋卿以嚴嵩力總理兩浙兩淮長蘆河東鹽政驟增鹽課四十餘萬所至市權納賄勢焰薰灼其按部常與妻偕行製五絲輿令十

二女子昇之。道路傾駭。淳安知縣海瑞供帳簡。抗言貧邑不能容軒車。慈谿知縣霍與瑕亦清鯁不屈。懋卿嗾巡鹽御史袁淳劾之。俱削籍。及嵩敗。懋卿以賊戍邊。

二月南京兵亂。殺總督糧儲侍郎黃懋官。

先是南京設振武營募健兒。禦倭素驕悍。懋官稍裁抑之。諸軍大怨。遂以都肄日殺懋官裸尸於市。守備太監何綬等遣吏持黃紙許給賞萬金。卒輒碎之。許禍十萬金乃稍定。巡撫李遂密捕首惡二十五人。繫獄事聞。遂褫懋官誅叛卒三人。而三人已前死。兵自此益驕。

秋七月大同總兵劉漢襲俺答於豐州破之。

先是虜聚衆喜峰口。規犯薊鎮。漢乘虛擣其巢於灰河。

虜稍遠徙至是漢復與叅將王孟夏等分道出擣豐州禽斬百五十人焚板升略盡時邱富已隨虜帳他徙趙全亦遁免。

四十年春二月朔日食。○景王載圳之國。

初莊敬太子薨廷臣言裕王次當立不報帝晚年信方士語二王皆不得見載圳年少左右頗懷覬覦至是之國德安居四年薨無子國除。

三月太白晝見。○秋七月朔日食。○冬十一月以袁煒爲武英殿大學士。

先是二月日食微陰煒言不當救護禮部尚書吳山不從得譴去遂以煒代山及七月又日食欽天監言食止

一分五秒。例免救護。煒乃阿帝意上言。陛下以父事天。以兄事日。是以太陽晶明。氛祲銷爍。食止一分。與不食等。臣等不勝欣忭。未幾遂進尚書入閣。煒本以青詞進。與李春芳嚴訥郭樸並號青詞宰相。

萬壽宮災。

萬壽宮在西苑。帝自二十一年宮婢之變。卽徙居此。時適暫移玉熙宮。火作。禁衛不及救。乘輿服御及先世寶物盡燬。

四十一年夏五月。嚴嵩以罪免。其子世蕃下獄。

帝居西苑。大臣希得進見。惟嵩獨承顧問。御札一日或數下。雖同列不獲聞。以故嵩得逞志。通引私人居要地。

帝亦寢厭之而漸親徐階。會階所厚吳時來張翀董傳策各疏論嵩。帝雖紬言者然心不能無動。初帝所下手詔語多不可曉。惟世蕃一覽了然。答語無不中。及嵩妻歐陽氏死。世蕃居喪不得入。無所代。票擬嵩每遣人持問世蕃。值其方縱淫樂。不以時答。嵩自爲之。往往失指。所進青詞又多假他人手。不能工。以此積失帝歡。會萬壽宮災。嵩請徙南城。離宮南城。英宗爲太上皇時所居也。帝不悅。而階營萬壽宮甚稱旨。帝眷益移。朱幾。八方士藍道行言欲逐嵩。御史鄒應龍避雨內侍家。偵知之。因抗疏極論嵩父子不法。遂罷嵩下世蕃。及其客羅龍文於獄。擢應龍通政司叅議。侍郎魏謙吉等數十人皆

坐姦黨黜謫有差高歸後六年寄食墓舍以死。

土蠻寇遼東總兵黑春戰死。

土蠻入撫順復攻鳳凰城春與把總田耕等力戰三日
夜死之。

秋八月加戶部尚書高耀太子少保。

初大內災宦官有密收龍涎香者至是帝索之急耀從
禁中購得八兩用聖壽建醮日獻之大稱旨賜銀幣等
加太子少保耀初貽嚴世蕃臘戶部尚書以貪穢著及
世蕃敗知不爲公論所容乃要結爲固位計。

九月三殿成。

更奉天殿曰皇極華蓋殿曰中極謹身殿曰建極。

冬十一月分遣御史求方書。

帝晚年求方術益急。陶仲文死。乃命御史姜儆王大任分行天下。訪求方士及符籙祕書。閱二年還朝。上所得法祕數千冊。薦方士唐秩、劉文彬等數人。儆大任俱擢侍講學士。

倭陷興化府。總兵俞大猷副總兵戚繼光擊破之。

初倭去浙江。嘗一犯淮揚吳越。皆不利。遂巢閩中。破城十餘。掠子女財物。殺傷官吏軍民不可勝紀。轉漕增餉。天下騷然。至是閩患少熄。

四十二年冬十月辛卯。把都兒入寇京師。戒嚴。

虜數犯遼塞。總督楊選因紮三衛長通等。令其子更迭

爲質通罕者辛愛妻父也。冀以牽制辛愛三衛皆怨。至是把都兒等潰牆子嶺入。大掠順義三河諸將趙濤孫贖戰死京師戒嚴大同總兵姜應熊敗寇於密雲乃退詔誅選。

四十二年春二月伊王典秩有罪廢爲庶人國除。

典秩奪民舍以廣其宮。索郎中陳大壯宅不與使人絕大壯飲食斃之築崇臺連城擬帝闕強取民間子女七百餘留其姝麗者餘令以金贖巡撫張永明等上言狀詔壞所造宮城歸民間女執羣小付有司典秩不奉詔乃除世封。

夏五月朔日食

魚

四十四年春三月袁煒罷嚴世蕃伏誅

世蕃論戍雷州未至而返益大治園亭乘軒衣蟒勢焰
木少袁袁州推官郭諫臣與巡按御史林潤謀盡發其
罪且及寃殺楊繼盛沈鍊狀世蕃喜謂其黨曰無恐獄
且解刑部尚書黃光昇等以獄詞白徐階階曰諸公欲
生之乎夫楊沈之獄嵩皆巧取上旨今顯及之是彰上
過也必如是諸君且不測嚴公子騎款段出都門矣爲
手削其草獨按羅龍文與汪直交通賄世蕃求官世蕃
用曰者言南昌倉地有王氣取以治第制擬王者又結
宗人與樸陰伺非常多聚亡命南通倭北通虜共相響
應卽日令光昇等疾書奏之世蕃聞詫曰死矣遂棄市

籍其家珍異充斥踰於天府。

夏四月以嚴訥李春芳爲武英殿大學士冬十一月嚴訥

訥仍掌吏部晨理部事尋直西苑供奉青詞積勞成疾

遂罷歸

四十五年春二月下戶部生事海瑞於獄。

瑞上言陛下卽位初年敬一箴心冠履分辨天下欣然
望治未久而妄念牽之謬謂長生可得一意修元二十
餘年不視朝政法紀弛壞數行捐納名器濫矣二王不
相見人以爲薄於父子以猜嫌誹謗戮辱臣下人以爲
薄於君臣樂西苑而不返人以爲薄於夫婦吏貪官橫

民不聊生水旱無時盜賊滋熾陛下試思今日天下爲何如乎。古者人君有過賴臣匡弼今乃修齋建醮相率進香仙桃天藥同詞表賀建宮築室則將作竭力經營購香市寶則度支差求四出陛下誤舉之而諸臣誤順之無一人肯爲陛下言者諛之甚也自古聖賢垂訓未聞有所謂長生之說陛下師事陶仲文仲文則旣死矣彼不長生而陛下何獨求之誠一旦翻然悔悟日御正朝與諸臣講求天下利病洗數十年之積誤使諸臣亦得自洗數十年阿君之恥天下何憂不治萬事何憂不理此在陛下一振作間而已帝得疏大怒抵之地顧左右趣執之無使遁宦官黃錦在側曰聞此人上疏時

市一棺訣妻子待罪於朝童僕亦奔散無留者是不遁也帝默然少頃復取讀之爲感動太息留中數月會帝有煩悶疾逮繫論死穆宗嗣位乃釋之

三月以郭樸爲武英殿大學士高拱爲文淵閣大學士樸拱皆由徐階薦召入直廬至是同入閣

夏四月朔日食○六月旱○冬十月俺答寇大同叅將崔世榮戰死○十一月帝有疾

以服方士王金等所獻丹藥故也

十二月帝崩裕王載堦卽位

徐階草遺詔召用建言得罪諸臣死者卹錄方士付法司論罪一切齋醮工作及政令不便者悉罷之

冊

穆宗莊皇帝隆慶元年春正月罷睿宗配享明堂。

禮部尚書高儀上言先帝肇祀明堂奉睿宗配享。今睿宗已爲皇祖若仍配享上帝似非周人宗祀文王之義。請罷大享禮從之。未幾給事中王治上言獻皇帝雖爲天子父實未嘗君臨天下。雖爲武宗叔嘗北面事武宗。今位武宗之右未合典禮不報。

追尊母杜氏爲孝恪皇太后。○二月立皇后陳氏。○以陳以勤爲文淵閣大學士張居正爲東閣大學士。以勤居正俱侍裕邸講讀至是並參大政。

三月葬永陵。

孝潔肅皇后孝恪皇太后同祔。

夏四月御經筵○五月塞決河。

先是河決曹縣汎溢徐沛間河漕尚書朱衡以南陽夏村至留城凡一百四十一里地高阜河流至昭陽湖不復東乃疏盛應期所鑿新河引鮎魚諸泉薛沙諸河注之壩三河口又疏舊河築馬家橋堤扼河流使盡入秦溝又鑿王家口導薛河入赤山湖鑿黃浦導沙河入獨山湖旱則資以濟漕潦則洩之昭陽湖運道遂通。

高拱罷

初徐階甚親拱及拱驟貴負氣頗忤階世宗疾亟拱方直西苑遽移具出爲給事中胡應嘉所劾疑出階指大憾之及帝卽位階爲首輔拱自以舊臣故與拱不睦

復助之。因事削應嘉籍給事中歐陽一敬等劾拱以私怨逐諫臣拱疏辨階擬旨慰留而不甚譴言者拱益怒相與忿詆閣中於是言官論拱無虛日拱不自安乞罷歸

六月霖雨傷稼○秋七月遣使招撫山東河南流民給復五年○八月帝視國子監○九月俺答寇山西

俺答數犯山西至是復率衆數萬分道寇并坪朔州偏頭關老營堡邊將不能禦遂長驅破石州殺知州王亮桑大掠孝義介休平遙文水交城太谷陽州開男女死者數萬而三衛勾土蠻同時入寇薊鎮昌黎撫寧樂亭盧龍皆被蹂躪遊騎至灤河京師震動三日乃引去

郭僕罷○冬十月以王崇古總制三邊

時吉能據河套爲西陲諸部長別部賓免駐牧大小松
山南擾河湟番族亦起爲寇乃擢崇古兵部侍郎總督
延綏寧夏甘肅軍務

二年春二月帝耕藉田○三月立孝翊鎮爲皇太子○京
師地震○夏五月以都督同知戚繼光鎮薊門

繼光至鎮議建敵臺千二百所臺宿白人二千里間聲
勢相接又立車營製拒馬器節制精明器械堅利薊門
軍容遂爲諸鎮冠

秋七月徐階罷

帝卽位以來階所持諍多宮禁事行者十八九中官多

側目給事中張齊前奉命犒軍宜大受鹽商金因疏請恤邊商革餘鹽爲階所格至是上疏攻階階引疾求退許之

冬十月遼王憲爚有罪廢爲庶人國除

憲爚在世宗朝以奉道被寵賜真人號至是巡按御史邵光劾其淫虐僭擬遣侍郎洪朝選等勘實免爲庶人國除初張居正與憲爚有隙及朝選往勸諷令坐以謀反朝選不從居正怒屬巡撫勞堪羅織朝選死獄中

三年秋八月以趙貞吉爲文淵閣大學士○冬十二月命廠衛刺部院事

帝以災異頻仍由部院政事不平所致令廠衛密訪以

聞於是尚書毛愷侍郎萬士和等皆自劾求去帝慰留
給事中舒化等上言祖宗設厰衛令捕盜詰奸非以察
百官也制馭百官乃天子之權而奏核諸司責在臺諫
今陛下委之厰衛必託之番校此輩貪殘恐開羅織之
門不可不慎帝報聞

召高拱復入閣

拱性強直自速頗快恩怨及再入閣盡反徐階所爲凡
先朝得罪諸臣以遺詔錄用贈卹者一切報罷且言明
倫大典頒示已久今優顯議禮諸臣陛下歲時入廟何
以對越二聖帝深然之

四年春正月朔日食罷元會。夏四月京師地震。秋七

月禁草奏浮詞。

高拱言。比來章奏鋪綴連牘。言多意晦。端緒難尋。翻可竄匿名實。請嚴加禁約從之。

陳以勤罷

以勤入閣。徐階爲首輔。而高拱方嚮用。朝士各有所附。交相攻以勤中立無所比。及拱再入。與趙貞吉相軋。張居正復中構之。以勤與拱舊僚。貞吉其鄉人。而居正則所舉士也。度不能解引疾乞休去。卒贈太保諡文端。

罷戶部尚書劉體乾。

是時內供浸多。數下戶部取太倉銀。又趣市珍珠黃綠玉諸物。體乾屢疏爭。積忤帝意。遂罷。

八月河決邳州。

初新河既成南北諸支河悉併流秦溝河勢益大漲三年七月決沛縣至是復決邳州自睢寧白浪淺至宿遷小河口淤百八十里阻漕河道侍郎翁大立言邇來河患不在豐沛而在徐邳臣以爲權宜之計在棄故道而就新衝經久之策在開沭河以避洪水帝命大立躬自相度條利等以聞。

九月以年歲災爲遣東總兵官。○冬十月僉合孫把漢那吉內附詔遣使尋遣歸。

把漢幼孤育於僉答妻所既長而娶與妻不相得復自聘與元都司女爲妻。○卽僉答外孫女也僉答見其

美尊之把漢恚率屬十餘人來歸。入同巡撫方正。以
告王崇古。崇古上言。把漢來歸。并擁衆內附者。比宜給
官爵。豐館餼。飾輿馬。以示俺答。俺答急。則令縛送板升。
諸叛人不聽。卽脅誅把漢。牽沮之。又不然。因而撫納。如
漢置屬國。居烏桓。故事。使招其故部。徙近塞。俺答老且
死。黃台吉立。則令把漢還。以衆與台吉抗。我按兵助之。
此安邊之大略也。奏。至朝議紛然。高拱張居正。力主崇
古議。詔授把漢指揮。使俺答方西掠土番。聞之。急引還。
約諸部入寇。崇古檄諸道嚴兵禦之。遣譯者往。令縛送
板升諸叛人。以易把漢。俺答遂遣使乞封。請互市未幾。
執趙全等九人來獻。崇古以帝命遣把漢歸。

十一月趙貞吉罷。

高拱掌吏部。貞吉亦掌都察院。拱以私憾考察科道。去貞吉所厚者二十餘人。又喉門生給事中韓楫劾貞吉庸橫。貞吉疏辨。言臣掌風憲。目睹拱壞亂選法。噤口不能一言。有負任使。臣放歸後。幸仍還拱內閣。毋令久專大權。廣樹衆黨。疏入。帝手詔令。貞吉致仕。貞吉好剛。使氣。動與物忤。人多怨之。卒贈少保。諡文肅。

以殷士儋爲文淵閣大學士。

士儋本裕邸舊僚。高拱惡其不親。已不爲援。士儋遂藉太監陳洪力。取中旨入閣。

五年春三月。封俺答爲順義王。

犯漢邪吉既歸。俺答遣使報謝。誓不犯大同。王崇古上言。朝廷許俺答封貢。諸邊有數年之安。可乘時修備。設敵背盟。吾以數年蓄養之力。從事戰守。愈於終歲奔命自救不暇者矣。復條封貢八事以請從之。遂封俺答順義王。昆都力辛愛等皆授官。有差。封把漢將軍。將軍指揮如故。萬歷初。名俺答所居城曰歸化。

夏五月。李春芳罷。

始徐階罷。春芳歎曰。徐公尚爾。我安能久容。且夕乞身耳。居正曰。如此。庶保令名。春芳愕然。三疏乞休。不允。及高拱再入。與春芳不能與爭。自飭而已。會拱還去。貞吉勢益張。修階故怨春芳。常從容爲階解。拱益不悅。言官

御批通鑑輯覽卷之四
希拱意疏詆春芳乃罷歸。

六月京師地震。冬十月河南山東水。十一月殷士儋罷。

御史趙應龍劾士儋進由內侍不堪大任給事中韓楫復揚言脅之士儋遂乞休去。

壬申

六年春正月築徐邳河堤。

時復以朱衡經理河工遂罷洳河議專事徐邳築長堤自徐州至宿遷三百七十里并繕豐沛大黃堤正河安流運道大通。

閏三月帝有疾。夏四月以高儀爲文淵閣大學士。五月帝崩。六月朔日食。太子翊鈞卽位。罷中極殿大

學士高拱

始拱與張居正友善既而內離猜防日甚穆宗崩太監馮保矯遺詔掌司禮監及帝登極保升立御座旁不下舉朝大駭拱以主上幼冲憊中官專政疏請詘司禮權又屬言官合疏攻保而已從中擬旨逐之使人報居正居正陽諾之私以語保保密奏拱擅權不可容明日召羣臣入宣詔數拱罪罷之居正遂爲首輔

高儀卒

儀性簡靜寡嗜好入閣兩月卒貧無以殮諡文端

以呂調陽爲文淵閣大學士。尊皇后爲仁聖皇太后貴妃李氏爲慈聖皇太后

舊制天子立尊皇后爲皇太后若有生母稱太后者則
加徽號以別之馮保欲媚帝生母李貴妃風張居正以
並尊居正不能違也慈聖移居乾清宮撫視帝內任保
而大柄悉以委居正焉

帝御文華殿講讀

張居正請定三六九日視朝餘日御文華殿講讀

秋九月葬昭陵。冬十二月以宋儒羅從彥李侗從祀孔
廟

御撰資治通鑑綱目三編卷十五

起癸酉明神宗萬曆元年盡凡十九年
辛卯明神宗萬曆十九年

神宗顯皇帝萬曆元年春二月御經筵○男子王大臣入

乾清宮伏誅

大臣京師傭奴偽爲內侍服入乾清宮被獲下東廠馮保欲緣此陷高拱令家人飲食之納刃其袖中俾言拱怨望與太監陳洪謀大逆遂發緹騎馳械高氏奴圍拱里第張居正亦請詰主使舉朝洶洶且謂逮拱吏部尚書楊博左都御史葛守禮詣居正力解居正奏緩其獄博使校尉怵大臣吐實又以拱僕雜稠人中令大臣識別茫然莫辨也帝命守禮偕錦衣都督朱希孝會訊大

臣疾呼曰許我富貴乃撈掠我耶且我何處識高閣老
希孝不敢鞠而罷保懼以生漆酒瘡大臣移付法司坐
斬拱得白

三月詔舉將才

張居正進講因言今承平日久武備廢弛文吏箝制弁
員不啻奴隸平日不能養其鋒銳臨敵何以責其折衝
嗣後將帥忠勇可任者宜假以事權俾得展布故有是
命

秋九月以方逢時總督宣大軍務

始逢時與王崇古共決貢市之議崇古入理京營張居
正薦逢時代之至則申明約信邊境益安

冬十一月立章奏考成法

初諸司章奏部院覆行撫按勘者常稽不報張居正請以大小緩急爲限立文簿月終註銷閣科部院遞相糾舉誤者抵罪自是政體爲肅

十二月朶顏長禿犯塞總兵官戚繼光擊禽之

時俺答雖款塞而土蠻從居插漢地控弦十餘萬常爲薊門憂泰寧朶顏諸部皆與交通時叛時服是年春朶顏部長董狐狸及兒子長昂入犯喜峰口繼光擊敗之狐狸乃請貢至是狐狸之弟長禿復入寇繼光禽之於是狐狸長昂率部長親族三百人叩關請死乞赦長禿繼光遣將受降皆羅拜獻還所掠人攢刀設誓乃釋長

衛青傳
卷之三
二
禿許通貢如故繼光在鎮十六年薊門守甚固敵無由入盡轉而之遼故李成梁獨擅戰功

庚申

二年春正月召見朝覲廉能官於皇極門

太祖時外官奏事輒召見賜食訪民間疾苦佐貳雜職有廉能愛民者常特遣行人齎勅獎賚宣順成弘朝亦間行之張居正以考察屆期倣舊典具儀以上帝乃召見布政使謝鵬舉等二十人並賜銀幣

秋八月淮揚徐河海並溢○冬十月決囚

世宗晚年崇奉元修又好祥瑞遇事輒停刑至是審錄重囚至四百餘人張居正言縱釋有罪無以懲惡請如祖宗舊制每歲一決囚從之又嚴諱盜之禁犯者雖循

吏必黜盜爲少衰

三年春正月徙遼東六堡

遼陽鎮東二百餘里舊有六堡其地不毛與遼陽聲援不接李成梁請移孤山堡於張其哈刺佃險山堡於寬佃江沼新安等四堡於長佃長嶺諸處並據膏腴扼要害可拓境七八百里益收耕牧之利廷議從之於是撫順以北清河以南皆遵約束

夏四月朔日食既○秋八月以張四維爲東閣大學士

四維由張居正進謹事之不敢相可否隨其後拜賜進官而已

河決碭山

南畿大水。河決而北。淮決高家堰而東。高郵湖亦決。清水潭口。淮城幾沒。徐邳山陽南北漂蕩千里。河道淤淺。阻漕者數年。

九月。禮部尚書萬士和罷。

士和初官庶吉士。以忤嚴嵩改部曹。累任按察布政使。並著清節。及官尚書。張居止欲越例贈朱希忠王爵。馮保爲方士求官。士和俱力持不可。給事中余懋學言事得罪。士和言直臣不當斥。由是積忤。居正謝病歸卒諡文恭。

冬十月京師地震。

四年春正月巡按遼東御史劉臺以罪下獄。

時御史在外倖凌巡撫張居正欲痛抑之事小不合詰責隨下又飭其長加考察以故言路多不平時臺按遼東悞奏捷居正方引故事繩督之臺遂抗章劾居正居正疏言論者謂臣擅威福而臣所行正威福也將巽順以悅下耶則誤國將竭忠以事上耶無以逃專擅之譏因辭職不視事帝手勅敦諭始起逮臺下詔獄久之復用他事戍潯州

二月開草灣河

督漕侍郎吳桂芳上言淮揚洪潦奔衝緣海汊港久堙入海止雲梯一徑致海擁沙橫河流汎濫而鹽安高寶屢成巨浸國家轉運惟知急漕而不暇急民故朝廷設

官亦主治河而不知治海。今黃河衝決駸駸欲奪安東以入海。請於草灣低窪之地挑新口以迎大溜。安東衆流匯圍其勢垂陷。不如委之以拯全淮。廷議安東未可棄。而命開草灣。閱七月工竣。水患稍平。

秋八月。帝視國子監。○河決崔鎮。

徐豐沛睢寧金鄉魚臺單曹八州縣多決。田廬湮沒。無算。河流鬻宿遷城。吳桂芳請遷縣治。築土城以避之。明年復決而北。清口淤墊。全淮南徙。灇漫山陽高寶間。會河向桃源三義鎮。入老黃河故道。淮水乘虛入清口。老黃河復塞。

五年夏四月。兵部尚書譚綸卒。

論議敏綸終始兵事垂三十年。與戚繼光齊名稱譚戚。秋閏八月朔日食不見。○九月張居正以父喪起復。

居正父卒。戶部侍郎李幼孜首倡奪情議。馮保亦固留之。吏部尚書張瀚以持慰留旨被逐。於是請留者相繼編修吳中行檢討趙用賢員外郎艾穆主事沈思孝進士鄒元標交章爭之。皆坐杖戍。學士王錫爵等求解於居正。不得。侍講于慎行出一僞張位趙志臯修撰習孔教沈懋學皆疏救。不納。尋勅羣臣再言者誅無赦。錫爵慎行一僞懋學先後移病歸。

冬十月兵部尚書王崇古罷。

初俺答諸部嘗越甘肅掠西番。既通款其從孫切盡台

吉連歲盜番不得志求俺答西援。崇古每作書止之。是年俺答請赴青海迎佛。崇古上言。西行非俺答意。且以迎佛爲名。不可沮宜。飭邊鎮嚴守備。而陰洩其謀於番族。以示恩。給事中劉鉉尹瑾等。交章劾崇古弛防徇敵。崇古奏辨。因乞休去。

彗星見。十一月考察百官。

張居正自奪情後。知天下不與已。思以權刦之。時因星變。考察百官。趙志臯。張位。習孔教。相繼遷謫。南京御史朱鴻謨。馳疏救吳中行等。斥爲民。南京僉都御史張岳。請令居正奔喪。坐考察。自陳貶秩。禮部尚書何維禎。亦以自陳免。

六年春一月以潘季馴總理河漕。

先是總河傅希摯欲塞決口。吳桂芳主開老黃河故道。議未決。有言宜多濬海口以分水勢者。會桂芳卒。以季馴代之。季馴上言。故道久湮。雖濬復其深廣。必不能如。今河宜塞崔鎮決口。築遙堤以防衝潰。又淮清河濁。淮弱河強。河水一斗。沙居其六。伏秋則居其八。非極湍急。必至停滯。當藉淮以刷河之濁。築高堰東淮入清口。以敵河之強。使黃淮並流。沙隨水去。則雲梯海口不濬自通。卽葦灣亦可不復修治矣。因條上六事行之。乃塞崔鎮等決口。築高家堰。歸仁集。柳浦灣諸堤。自徐沛至淮揚間。遙堤縷堤。滾水減水壩。聞無不修築。逾年工成。

御製通鑑輯覽卷一百一十五

立皇后王氏。

先是帝大婚屆期慈聖太后歸慈寧宮諭張居正曰吾不能視皇帝朝夕師保之責崑特先生尋以居正充納采問名副使給事中李涑言大婚重典而使居正變服從吉於觀聽不宜乞別簡用不聽。

三月以馬自强爲文淵閣大學士申時行爲東閣大學士二人由張居正薦用自强素忤居正負伉直名旣入閣亦不能有爲。

秋七月呂調陽罷。

帝大婚後張居正乞歸葬許之賜帝賚忠良銀章如楊士奇張孚敬例得密封言事勅調陽等有大事勿專決

馳驛之荊州。聽居正處分。調陽內勲累疏乞休。及居正
還遂去。

詔選內監三千五百人。○冬十月馬自強卒。○十二月高
拱卒復其官。

拱練習政體所建白多可行。初在吏部遍識諸司賢否。
倉卒舉用皆得人。又以時方棘邊事。請增置兵部侍郎。
由侍郎而總督。而本兵中外迭居。人材自裕。更取各邊
地之人以備司屬。如銓司分省故弊皆報可。世宗服金
丹崩。法司坐方士子弒父律。拱言先帝壽考令終。曾無
暴遽。今謂爲王金所害。天下後世視先帝爲何如主。穆
宗深然之。始與張居正。舊惡稱其才。至是卒。居正奏復。

其官贈太師諡文襄

戶部奏是歲天下戶口之數

戶一千六十二萬一千四百三十六口。六千六十九萬二千八百五十六。

七年春正月。毀天下書院

時士大夫競講學。張居正特惡之。盡改各省書院爲公

廨

夏四月。張居正上肅離殿箴。

帝漸備六宮多宜索太倉銀購珠寶。居正言歲入則減於舊歲出則浮於前。請量入爲出。罷節浮費。因進肅離殿箴。帝嘉納焉。

秋八月減均徭加派。

國初役法有里甲均徭雜汎三等。自嘉靖以來行一條。賴法量地計丁。丁糧畢輸於官。一歲之後官爲僉募。頗稱簡便。然諸役冗費名罷實存。有司追徵如故。百姓苦之。至是詔減銀一百三十萬有奇。

庚辰

八年春二月朔日食。帝耕藉田。夏四月。巡東都督王元堂寇邊。李成梁擊敗之。

元堂怨邊將抑市價犯。穀陽及黃岡嶺指揮王宗義戰死。復入永奠堡。成梁擊走之。追出塞。斬首八百餘級。至秋復犯寬奠。副將姚大節又破之。元堂由是不振。

六月南畿大水。秋七月。後軍都督府僉事俞大猷卒。

大猷負奇節以古賢豪自期其用兵先計後戰不貪近功所在有功武平崖州饒平皆爲立祠謚武襄

冬十月汰冗官。○十一月度民田。

初建昌知府許孚遠始爲歸戶冊以田從人法簡而密至是復用開方法以徑圍乘除奇零截補於是豪猾不得欺隱而小民無虛糧總計田七百一萬三千九百七十六頃視弘治時贏三百萬頃張居正頗以濫額爲功有司短縮步弓以求田多後遂按濫額增賦

九年春三月大閱。○夏四月戎政尚書方逢時罷。

逢時才略明練處置邊事悉協機宜五年以宣大總督召理戎政時議者爭言貲市利害逢時疏言北部輸誠

效貢。莫敢渝約。歲時請求。宜與之輒稽首。歡笑有掠。
人要賞者。告俺答罰治卽。首聽命而異議者。或曰。敵
使充斥。日益耗費。或曰。與寇益狎。隱憂叵測。均未覩事
機之論也。今計三鎮歲費二十七萬。較之向時。十纔二
三。而民間耕穫之入。市賈之利。不與焉。方隆慶庚午。以
前三軍暴骨。萬姓流離。邊臣首領。不保朝廷爲之盱食。
七八年來。幸無此事矣。所不可知者。俺答老且死。數年
之後。諸部無所統一。狡黠爭構。或行侵擾。在我亦惟罷
貢市。固壁壘以待。仍禁邊將無輕舉。使曲常在彼。直常
在我。因機處置。顧方略何如耳。封疆之事。無常形。何必
貢市。非而戰守是哉。至是以老病乞休去。其功名與王

崇古相亞世稱方王。

土蠻犯遼陽副總兵曹鼐敗績。○京師旱南畿饑。

張居正上言淮鳳蘇松連被災傷徐宿間至以樹皮充饑或聚爲盜昔元末之亂亦起於此當破格賑之陛下宜撙節宮中耗費世宗朝用最浩繁內庫尚餘積今已增額猶稱缺乏有限之財安能供無窮之用帝嘉納之

五月盡賣民間種馬。

國初馬皆官牧後改牧於民給草場以資芻牧自蒙古莊田占草場馬戶漸多逃竄穆宗從太僕少卿武金議賣種馬之半至是以互市饒馬盡賣之折徵草場地租

銀以供團營買馬及各邊之請迨帝末年師役繁興往
徃借支太僕銀久之銀與馬兩竭同政大壞

至
十年春正月免天下逋賦

張居正上言帶徵逋賦徒爲民累有司那新抵舊年分
雜淆小民竭脂膏胥吏飽谿壑甚者不肖有司因而漁
獵與其朘民以實奸貪之輩孰若盡蠲以施曠蕩之恩
帝從之凡免二百餘萬有奇是時國最完富太倉粟支
十年

速把亥寇義州李成梁擊斬之

泰寧部速把亥與弟炒花子卜言免八犯義州成梁設
伏鎮夷堡參將李平胡射中速把亥墜馬斬之寇大奔

炒花等慟哭去。自是敵數入成梁等數敗之。輒斬其魁。又時襲擊於塞外。敵少戢成梁以功封寧遠伯。

夏四月。京師旱疫。彗星見。六月朔日食。加張居正太師。以潘晟爲武英殿大學士。余有丁爲文淵閣大學士。晟尋罷。

張居正臥病。自度不起。乃薦晟有丁。自代。晟素貪鄙。不厭清議。馮保故從授書。強居正薦之。命下僅五日。爲言者交章劾罷。

太師中極殿大學士張居正。贈上柱國諡文襄。居正當政起衰振惰。幾於富強。

務尊主權。覈名實。神宗初。法嚴。勇於自任。諸不便者。

多怨之。及申時行爲首輔。務承帝指。又罷居正所行考成法。一切務爲簡易。由是上下恬熙。法紀漸不振。

秋八月。子常洛生。

恭妃王氏所生。帝御殿受賀。頒詔大赦。廕馮保弟姪爲都督僉事。內官爲工匠。陳乞覃恩者至五百七十餘人。冬十二月。謫太監馮保爲奉御。安置南京。

帝初卽位。保朝夕視起居。小有忤格。卽以聞太后。太后訓帝嚴詰責。隨下。帝故積怒保。東宮舊閹張鯨張誠伺間。陳保過惡。並發其與張居正交結狀。御史江東之先劾保黨徐爵以嘗帝。帝果下爵獄。論死。李植乃攻保。帝謫保南京。奉御籍其家金寶鉅萬。東之并糾吏部尚書

梁夢龍賂徐爵得官。工部尚書曾省吾。吏部侍郎王篆。皆被論得罪去。於是彈擊居正者紛起矣。

以嚴清爲吏部尚書

清在部自丞佐以下皆親署無一倖進者。中外師其廉儉。書問幾絕。甫半歲得疾歸。

癸亥

十一年春三月追奪張居正官階。

馮保旣得罪。新進者益務攻居正。詔奪上柱國太師。再奪諡。

夏四月張四維罷。○以許國爲東閣大學士。○五月我

太祖高皇帝起兵征尼堪外蘭克圖倫城。○冬十一月朔日食。○

十二月慈寧宮災。

十二年春二月京師地震○釋建文諸臣外親之謫戍者御史屠叔明請釋革除忠臣外親後裔詔自齊泰黃子澄外其坐方孝孺等連及者俱免之於是浙江江西福建四川廣東得免者凡三千餘人至光宗嗣位并泰子澄戚屬後裔俱放還

夏四月籍張居正家

御史羊可立復追論居正構陷遼王王妃因上疏訟寃言遼邸金寶悉入居正帝命司禮監張誠等詣荊州籍居正家守令先期錄入口籍其門子女餓死者十餘輩誠等盡括其親族所有得黃金一萬白金十餘萬長子禮部主事敬修不勝拷掠自縊死詔盡削居正官尊璽

書諸命以罪狀示天下。其弟都指揮居易子編修嗣修
俱戍極邊。諸以忤居正罷黜者俱召還。初言路爲居正
所抑。至是爭礪鋒銳。搏擊當路。可立與李植江東之並。
荷帝寵。三人更相結。亦頗引吳中行。趙用賢。沈思孝爲
重執政。惡之。未幾御史丁此呂劾侍郎高啟愚主試。以
舜亦以命禹爲題爲居正勸進。帝手疏示時行。時行言
此呂以曖昧陷人大逆。恐讒言踵至。非清明之朝所宜
有。尚書楊巍請出此呂於外。植東之交章劾時行。巍破
塞言路。許國不勝憤。疏言昔之專恣在權貴。今乃在下
僚。昔顛倒是非在小人。今乃在君子。意氣感激偶成一
二事。遂自負不世之節。號召浮薄喜事之人。黨同伐異。

臣上行私其風漸不可長意蓋指中行用賢等也自是
言官與政府日相水火矣

冬十月余有丁卒。○十二月以王錫爵爲文淵閣大學士
王家屏爲東閣大學士。○詔以陳獻章胡居仁王守仁從
祀孔廟。

申時行等言守仁言致知出大學良知出孟子。陳獻章
言主靜。沿宋儒周敦頤程顥且孝弟出處如獻章文
功業如守仁純心篤行如胡居仁並宜崇祀從之。終明
世從祀文廟者薛瑄與守仁等四人。

十三年春二月京師旱大雩

帝步禱南郊詔中外理冤抑免天下被災田租一年

三月以尚寶少卿徐貞明領墾田使督治京畿水田。

初貞明爲給事中嘗請興西北水利如南人圩田之制引水成田時以財匱不能舉及謫官南行又著潞水客談論水利當興者十四事既還朝給事中王敬民荐之會巡撫張國彥等方開水利於薊永有效遂命貞明兼監察御史領墾田使貞明先詣永平募南人爲倡及明年二月已墾三萬九千餘畝又遍歷諸河周覽水泉分合將大行疏濬而奄人勦戚之占田者爭言不傾帝惑之遂罷。

秋七月雷震郊壇○八月京師地震○冬十一月禮科給事中王三餘請帝親郊不從

三餘請帝親郊以答天戒帝怒其奏請不早詰責之仍遣官代

十四年春二月冊鄭氏爲皇貴妃。

妃鄭氏有殊寵生子常洵進封皇貴妃而王恭妃生皇長子已五歲不益封中外籍籍疑帝將立愛給事中姜應麟首抗疏請立元嗣爲東宮貶廣昌典史大學士申時行率同列再請建儲不聽帝嘗下詔求直言郎官劉復初李懋檜等顯侵貴妃時行請帝下詔令諸曹建言止及所司職掌聽其長擇而獻之不得專達帝甚悅之於是言者蠡起章累千百皆指斥宮闈攻擊執政帝槩置不問門戶之禍大起

夏六月松茂番平。

松茂諸番屢犯邊殺守將巡撫徐元泰遣總兵官李應祥進討應祥樹赤白幟各一下令良民陷賊者徒手立赤幟下熟番不附賊者徒手立白幟下卽免罪番遇急不相救官軍連破河東河西諸巢禽賊渠三十餘人俘賊千計又討建昌番及邛部屬夷以其地置屏山縣蜀中劇寇盡平應祥由是威名甚著。

冬十一月祀南郊。

十五年春三月詔擢力克襲封順義王。

初俺答死子乞慶哈襲至是乞慶哈死子擢力克襲其妻三娘子卽俺答所奪之外孫女而爲婦者也歷配三

王主兵柄諸部畏之自宣大至甘肅不用兵者垂二十年帝嘉其保塞功亦封忠順夫人

夏四月旱京師地震○秋二月江南水江北山西陝西河南山東旱

時所在災荒河北尤甚部右侍郎孫丕揚上言海內困加派宣寬賦節用捐益下以培大命帝感其言頗有所減罷

九月朔日食不見○冬十月南京右都御史海瑞卒

瑞力矯偷惰墨吏望風解印去及卒士大夫醵金爲斂百姓罷市送者數百里不絕贈太子太保諡文介

十六年春二月詔改景皇帝實錄去邸戾王號不果行

戊子

時上下偷惰詔勅多不奉行景帝實錄終明世未嘗改也

南畿浙江山西陝西河南大饑疫

紀

十七年春正月朔日食

時以日食免朝賀嗣後每元旦皆不視朝

夏六月賑南畿浙江饑

南畿久旱浙江大風海溢既而亦旱發帑金八十萬賑

之

錄

十八年春正月召見申時行等於毓德宮

大理評事雒于仁上酒色財氣四箴直攻帝失帝震怒將加嚴譴召見時行等分析之時行請毋下其章而諷

令于仁自引去。于仁賴以免。然章奏留中。遂成故事。是日宣皇長子出見。時行請早定大計。帝猶豫久之。乃曰。朕不喜激聒。近閱諸臣所奏。惡其離間父子。故概置之。若廷臣不復奏擾。當以後年冊立。否則俟皇長子十五歲舉行。時行因戒廷臣毋瀆擾。

二月罷日講。

帝每遇講期。多傳免申。時行請免講。曰。仍進講章。以備觀覽。自後請筵遂永罷。

三月以宋纁爲吏部尚書。

纁前爲戶部五年。值四方多災。酌盈虛籌緩急。上下賴之。石星代爲戶部。語纁曰。某郡有羨餘。可濟國用。纁曰。

朝廷錢穀寧積久不用。勿使搜括無餘。上知物力充羨。則侈心生矣。時中外陳奏帝多不省。或直言指斥。亦不罪。于慎行稱帝寬大。繆曰言官極論得失。要使人主動心。縱罪及言官。上意猶有所微省。概置勿問。則如癢痺不可療矣。及移吏部。絕請託。獎廉抑貪。痛懲黠吏於政府。一無所關。白屢乞休。不允。卒官謚莊敬。

夏六月。青海酋火落赤犯邊。

自俺答西掠。諸番番人不支。輸款於虜。虜騎遂數入番中。至是套部莊禿賴等據水塘卜失免。火落赤等據莽刺捏工兩川。而火落赤尤黠傑。數犯甘涼岷洮西寧間。副將李聯芳戰沒。未幾復大掠河州。臨洮渭源官軍禦。

之敗績西陲大震時堵力克勢衰亦爲卜失免等所誘
西行遠邊帝惡之詔停市賞

秋七月朔日食。○命兵部尚書鄭維經略邊防。

維前督宣大軍撫順義王及忠順夫人有恩故用之維
以洮河之難由縱虜入青海所致乃馳詣甘肅卜令曰
北部入青海者拒之於是擊破卜失免軍大布招番之
令歸附者日衆乃進兵青海逐火落赤諸部而諭堵力
克縛獻首叛踰二年堵力克以史二等來獻命復其市
賞

十九年春閏三月彗星見。○夏四月朔享太廟。

是後廟祀皆遣代

六月王錫爵罷。

火落赤犯邊議者爭請用兵。錫爵與申時行主款。忤帝意。未幾偕同列請建儲。不得遂。以母老乞歸。

秋畿內蝗。八月申時行許國罷。

閣臣疏請建儲。首列時行名。時行聞帝怒。密疏言臣方在告。實不與知。給事中羅大紘劾時行陽附廷臣請立之議。陰爲自交官掖之謀。欽人黃正賓者以貴爲中書舍人。思立奇節。自附清流。見大紘疏。亦抗章詆時行。帝怒斥大紘。正賓爲民。時行力求罷國與家屏。又以建儲請帝責大臣不當與小臣比。遂罷時行。國獨留家屏。以趙志臯張位爲東閣大學士。

申時行密薦志皐位遂用之吏部尚書陸光祖言舊制
閣臣必由廷推若令一人密薦恐開植黨之門志皐位
因疏辭帝不允

冬十一月遼東總兵官李成梁罷

十七年以後十蠻結西部數入寇將弁多戰沒成梁又
潛兵出塞襲虜遇伏死者千餘人仍報功并增僭脰敵
再入海州成梁不敢擊縱掠數日去是年閏六月成梁
乘給事中侯先春闖邊謀搗巢功遣副將李常襲破板
升還師遇敵死者又數千爲巡按御史胡克儉所劾及
先春還朝尤力詆之遂罷成梁官以寧遠伯奉朝請

御覽
金鑑
新編
五

九二二二

九

御撰資治通鑑綱目三編卷十六

起壬辰明神宗萬曆二十年凡二十一年

壬辰

二十年春二月哮拜據寧夏反遣總兵官李如松會總督

魏學會討平之

哮拜西部人嘉靖中來降屢立戰功官副總兵拜老子
承恩襲性狼戾巡撫黨馨屢裁抑之拜遂嗾軍士劉東
賜許朝等殺馨陷河西四十七堡誘套虜入犯花馬池
全陝震動學會檄諸將沿河扼賊南渡而自駐花馬池
當賊衝未幾四十七堡皆復惟寧夏尚為賊據帝從廷
議以李成梁子如松提督陝西軍務學會及甘肅巡
撫葉夢熊討之屢攻城不下及秋賊復勾套虜分道入

冠章制軍軍降曾檄延緩兵乘虛出搗巢虜始退遂議
決河灌城而先遣人誘東陽朝令殺噶拜父子自贖監
軍御史梅國楨督戰甚急劾學曾玩寇逮下獄以夢熊
代之賊被圍食盡其黨內攜互相殺冬十月承恩開門
降拜闔室焚死夢熊盡誅拜黨俘承恩至京師誅之學
曾逮未逾月賊遂平詔復其官

三月王家屏罷

給事中李獻可以疏請豫教元子謫外家屏封還御批
力諫帝怒遣內侍至其邸責之於是力求去詔馳傳歸
夏四月總督河道尚書潘季馴罷

季馴四任治河前後二十七年習知地形水勢以借水

極沙築堤束水爲河漕兼利之策下至木石椿埽綜理
纖悉以勞疾累疏乞休不允至是泗州大水與撫按議
濬治不合得請歸後三年卒

五月倭陷朝鮮

僞倭王平秀者起人奴篡立雄踞三十六州窺朝鮮
弛備分遣行長清正等率舟師從對馬島至釜山破朝
鮮入王京朝鮮入追幾沒國王李昫倉皇出走渡鴨綠
江求內屬請援之使絡繹於道詔以宋應昌經略備倭
軍務李如松爲總兵官救之兵部尚書石星奏遣辨士
沈惟敬詣軍前請金行間明年如松以連勝輕敵猝遇
倭於碧蹄館官軍喪失甚多如松氣大索應昌亦急欲

休息乃令倭敬至倭營議封貢會倭糧盡棄王京走據
釜山惟敬同倭使來請款石星力主之召應昌如松班
師二十四年遣使封平秀吉爲日本國王倭已受册而
怒朝鮮報謝無禮留兵釜山如故帝怒逮星下獄論死
更命邢玠總督薊遼軍務麻貴爲總兵官楊鎬以僉都
御史經略朝鮮玠知行長與清正有智遂督諸路軍專
趨蔚山攻清正倭結三棚以自固遊擊陳寅連破二棚
而鎬故與李如梅善欲待其至分功詎鳴金收軍明日
攻之不能下倭收兵猝至鎬大懼先士卒諸軍繼之前後
死者二萬人事聞帝命罷鎬聽勵

已亥
二十一年春正月召王錫爵復入閣

錫爵至密請建儲以踐大信帝手詔欲待嫡子令元子
與兩弟且並封爲王錫爵懼失十指立奉詔擬旨進又
外慮公論因言漢明帝馬后唐明皇王后宋真宗劉后
皆養諸妃子爲子請令皇后撫育元子而生母不必崇
位號以上壓皇貴妃亦擬旨進帝竟下前諭令有司具
儀於是舉朝大譁禮部尚書羅萬化給事中史孟麟等
請錫爵力爭廷臣諫者章日數十錫爵偕趙志臯張位
請追還前詔不從已而諫者益衆岳元聲顧允成等十
餘人遮錫爵於朝面爭之錫爵請下廷議不許請面對
亦不報因自劾求罷帝亦迫公議追寢前命命少俟二
三年舉行

秋七月吏部尚書孫鏞罷

先是大計京官。鏞與考功郎中趙南星力杜請謁。盡黜執政私人。於是衆多憾之。給事中劉道隆劾南星專權植黨。貶南星三秩。鏞亦奪俸。遂連疏乞休去。

八月彗星見紫微。

午市

二十二年春二月。皇長子常洛出閣講學。時已十四歲。出閣用東官儀。中外欣慰。

河南饑。○吏部郎中顧憲成削籍。

先是羣臣爭國本。惟王家屏與言者意合。申時行、王錫爵皆宛轉調護。亦頗以言者爲多事。憲成主文選。凡所推舉。多與政府牴牾。至是會推閣臣。憲成舉家屏。忤帝。

意謂籍歸憲成既廢名益高里故有東林書院爲宋楊
時講道處憲成偕同志高攀龍錢一本等講學其中海
內聞風景附往往諷議時政裁量人物朝士慕之亦造
相應和由是東林名大著而忌嫉亦多其後孫不揚鄒
元標趙南星輩相繼講學自負氣節與政府相抗是爲
東林黨議之始

夏四月朔日食○五月以陳于陞沈一貫爲東閣大學士
○王錫爵罷

錫爵常請罷江南織造停江西陶器減雲南貢金力爭
不宜用廷杖爲世所稱特以阿並封旨被物議旣而趙
南星斥趙用賢放歸論救者咸被譴責衆指錫爵爲之

因連章自明乞罷歸。

秋八月以孫丕揚爲吏部尚書。

丕揚清正不撓百僚無敢干以私者獨惠中官請謁乃創爲掣籤法大選急選悉聽選人自掣請寄無所容然銓政自是一變。

冬十月炒花犯遼東總兵官董一元擊敗之。

初連把亥爲官軍所殺其弟炒花子把兔兒益結土蠻東西相倚數侵邊一元遣部將孫守廉馳右屯禦西部而自將大軍匿振武外爲空營以待敵騎深入官軍奮擊破之逐北七十餘里把兔兒中矢走西部亦解去一元復以歲晏敵不設備率健卒踏水渡河疾馳四百里

抵虜巢斬二百餘級獲牛馬甲仗無算把兔兒旋死諸部悉遠遁。

紀

二十三年春正月詔宗室得就試。

鄭世子載堉請宗室皆得儒服就試視才器使從之許奉國中尉以下入試輔國中尉以上爵尊不得與其後禮臣李廷機言封爵科目原自兩途彼既願從科目入仕應照士子出身資格銓除何拘原爵亦從之惟不得除京朝官。

夏五月京師地震○秋九月青海酋永邵卜犯甘肅叅將達雲擊敗之

永邵卜屢爲邊患重九日度諸將必燕飲擁勁騎直入

南川屬番偵告雲伏兵要害令番人繞出朶爾峽外潛扼其背而已提精卒二千夾擊大敗之斬七百餘級其走峽外者番人殲之爲西陲戰功第一

復建文年號

初司業王祖嫡以建文不宜革除上請沈鯉官禮部力贊之帝不從至是禮科給事中楊天民復以爲言詔附建文事蹟於太祖實錄之末復年號未幾南京太常寺卿沈子木疏言建文帝御宇五年顧不得一孟麥飯下同齊民於誼未忍請祔食懿文太子之側章下部議不果行

淮水溢浸泗州祖陵○冬十月朔廣饑

甲丙

二十四年春三月乾清坤寧兩宮災。○夏福建饑。○秋七月仁聖皇太后陳氏崩。○遣中官開礦。

初畿輔奸民怨中官多言礦利大學士申時行力持不可。至是承寧夏朝鮮用兵之後國用大匱營建兩宮計臣束手。前衛千戶仲春請開礦助工帝允之。自是獻礦峒者踵至。每遣中使偕原奏人往。首畿輔蔓延遍天下。其後各省增設稅使。如天津店租廣州珠監兩淮餘鹽浙江福建廣東市舶成都茶鹽重慶名木湖口長江船稅荊州店稅寶坻魚葦及門攤商稅等都邑關津中使碁布所至納奸民爲爪牙搜括及竄盜奴告主者畀以什之三。中人之家大半皆破。甚者招集亡命肆劫奪。

擅殺人有司稍忤意輒劾其阻撓逮治中外諸臣諫疏前後累數百上帝俱不聽由是民不聊生變亂叢起

閏八月朔日食○九月葬孝安皇后○河決單縣

時徐泗淮揚間無歲不苦水患總河楊一魁議分殺黃流以縱淮別疏海口以導黃於是役夫二十萬開桃源黃河壩新河起黃家嘴至安東五港灌口長三百餘里分洩黃水入海闢清口沙七里建武家墩高良礮周家橋石閘洩淮水三道入海且引其支流入江於是泗陵水患平而淮揚得無恙然一魁專力挑清淮泗間而上流單縣黃壩口之決如故後以黃壩不塞致衝祖陵斥

魁爲民

冬十二月陳于陞卒。

于陞少從父以勤習國家故實嘗請建東宮及時豫教與早朝勤政皆不報以災異乞罷亦不許于陞積憂成疾卒贈少保謚文憲。

酉二十五。年夏六月三。數災。

時帝銳意聚財多假殿工爲名言者謂天以民困之故災三殿以示儆奈何復因天災以困民帝不納屢徵木於川廣令輸京師費數百萬率破中官冒沒終帝世三殿實未嘗復建也至熹宗朝魏忠賢始成之。

秋七月赦。○擢州宣慰使楊應龍叛。

初應龍數從征調恃功驕蹇知川兵脆弱聞出剴州縣

詔逮繫。匿不出所。部何恩等詣有司告變。四川巡撫王繼光發兵討之。覆於白石。應龍上書自明。乃命南京兵部侍郎邢玠爲總督。往勘值東西用兵。不能窮治。因招撫之。應龍請執罪人獻金贖罪。遂縛獻黃元等。論輸四萬金。羈其次子可棟於重慶。追贖可棟等死。應龍益恨。遂糾諸苗反。殘餘慶掠大阡。都壩及興隆。都勻諸衛進圍黃平。殺官吏。後復大掠洪頭高平。諸屯寢及湖廣。命李化龍總督川湖貴州軍務討之。賊乘官軍未至。率衆陷綦江。盡殺城中人。投屍蔽江。楚黔道梗。

八月。京師地震。○冬十月。以黎惟潭爲安南都統使。初。莫登庸請封。制下而登庸已死。遂使其孫福海襲已。

戊戌

而福海不能輕來爲黎寧所逐寧死再傳至惟潭攻殺福海孫茂洽復據安南欸關求貢總督陳大科上言莫之篡黎其事逆黎之復仇其名正宜許其來歸詔以惟潭爲都統使自是安南復爲黎氏有而莫氏惟據高平一郡宗黨多竄處海隅時出侵軼爲邊患

二十六年夏四月土蠻犯遼東總兵官李如松出塞遇伏死○京師旱○六月張位罷

以薦楊鎬故也

秋八月京師地震○冬十一月倭遁去官軍分道追擊敗之朝鮮平

初官軍分道擊倭不利會平秀吉死羣倭俱有歸志其

渠帥清正發舟先走。總兵官麻貴遂入島山西浦。劉綎攻奪曳橋砦。都督陳璘敗其援兵。倭始揚帆盡去。自倭亂朝鮮七載。喪師數十萬。糜餉數百萬。中國與朝鮮迄無勝算。至秀吉死。禍始息。

以劉東星爲工部侍郎總理河漕。

初潘季馴議開黃河上流循商虞而下。歷丁家道口出徐州小浮橋。卽元賈魯所浚故道也。朝廷以費鉅不果。東星卽其地開濬。起曲里鋪至三仙臺。抵小浮橋。又濬漕渠自徐邳至宿遷。凡五閱月工竣。明年濬邳伯界首二湖。又明年開泇河南通淮海。引漕甚便。

官軍襲火落赤於松山走之復其地。

擗力克已東歸而虜火落赤卜失兔等頻年抄掠如故據三大巢曰河套曰海西曰松山聲息交倚總督三邊李汶內聯四鎮外招番人襲破寇衆於松山復其地築邊垣四百里。

己巳

二十七年夏旱。○閏四月遣中官覈天下積儲

以諸皇子婚詔取太倉銀二千四百萬兩戶部告匱乃命中官嚴覈各省積儲由是外帑日耗

秋八月陝西山崩

狄道縣有山長二百餘丈聲如雷者十數夜遂陷爲池山南平地湧山五高者二十餘丈

冬十月加四川湖廣田賦。

平庚

以播州用兵故

二十八年春二月京師地震。○夏六月川湖總督李化龍帥師平播州。

化龍集三省兵分八路進。賊奔據海龍國。總兵官劉綎先入婁山關直抵固下。諸軍繼至。築長圍。迭攻時久。兩將士馳泥淖中苦戰。大破之。應龍自縊死。七子皆就擒。詔殮應龍屍。以其地置遵義平越二府。分屬川貴。

冬十月兩畿盜起

頻年災旱又苦礦稅民多起為盜。浙人趙一平與其黨孟化鯨等招集亡命於徐州。自稱宋後。署偽官。期明年二月諸方並起。事覺伏誅。鳳陽巡撫李三才再疏礦

稅之害言陛下愛珠玉民亦慕溫飽陛下愛子孫民亦戀妻孥奈何崇聚財賄而使小民無朝夕之安又言近日章奏凡及礦稅悉置不省此宗社存亡所關一旦衆畔土崩小民皆爲敵國陛下卽黃金盈箱明珠填屋誰爲守之不報

二十九年夏五月罷山西巡撫魏允貞

中官張忠孫朝先後領山西礦稅誅求百方允貞每事裁抑疏暴其罪帝入朝譖將加譴責山西軍民數千詣闕爲允貞訟寃言官亦連章論救帝兩置不問允貞乃乞歸未幾卒晉人立祠祀之

旱

畿輔山東河南赤地數千里。

六月法司請熱審不報。

嗣後數年每請皆不報。獄囚久繫多死。

秋八月復以李成梁鎮遼東。

總兵馬林獲罪。沈一貫言成梁雖老尚堪將兵。乃命再鎮遼東。年已七十六矣。時土蠻長昂及把兔已死。寇掠漸稀。而開原廣寧復設馬木二市。諸部就市賞利爭競。欸以故成梁再鎮八年。遼左少事。

九月趙志臯卒。

志臯柔弱。頗爲朝士所輕。日本封貢。志臯與石星相應。和星敗。劾星者必及志臯。志臯乞休。疏八十餘上。俱不報。

許在告四年卒

以沈鯉朱賡爲東閣大學士。○冬十月立子常洛爲皇太子。

沈一貫請立東宮。帝已允行。尋復諭改期。一貫封還諭旨。力爭乃立常洛爲皇太子。同日封子常洵福王。常浩瑞王。常潤惠王。常瀛桂王。

三十年春二月帝有疾召沈一貫具詔除弊政。翼日疾瘳。寢前詔。

帝忽有疾召見一貫。諭以罷礦稅及江南織造江西陶器撤還所遣中官釋繫囚召用建言諸臣。一翼方擬旨進翼曰帝瘳悔之連遣中使十餘輩追還前諭。一貫惶

遠繳入。時司禮太監田義力爭。帝怒。欲手刃之。義言。愈力。而中使已持前諭至。後義見一貫唾曰。相公稍持之。礦稅撤矣。何怯也。自是言者皆不聽礦稅之害。遂終帝世。

閏月。河州黃河竭。○秋七月。緬犯騰越。

初。雲南稅監楊榮開採阿瓦猛密諸寶。云歲可得數十萬。既而所進不得什一。又開採麗江土司地。勢益橫。夷漢居民相率燔稅廠。殺委官。至是。緬人以稅使貪暴。爲亂。攻陷蠻莫。宣撫使思正奔騰越。緬賊追及之。有司殺思正以謝賊。始解。

三十一年春正月。營兩宮。○詔戶兵二部覈軍實。

時內府所供寢多。戶部困不能支。九邊額軍八十六萬。有奇。將弁率以空名支餉。且多尅減。邊兵屢譁。帝急命戶兵二部鉤考軍實。卒不能振刷也。

夏四月朔日食

是日當享太廟。禮部侍郎郭正域言。禮當祭而日食。牲未殺則廢朔。且宜救日。詰朝享廟。從之。

五月京師地震。○六月黜楚中尉華越爲庶人。

初。楚恭王薨。遺腹宮人胡氏孿生子。華奎。華璧。或曰。內官郭綸取他人子養之宮中。莫能明也。萬歷八年。華奎嗣王。華璧亦封宣化王。楚宗人華越等。訐異。姓子不當亂宗。沈一貫屬通政使格其疏。不上。月餘。華奎劾華越。

疏至乃上之。帝從郭正域、沈鯉議，令撫按行勘。撫按皆言無左驗。中旨以楚王襲封已二十餘年，坐華越等誣奏降庶人。錮之鳳陽。明年，華奎獻萬金助工。經漢陽宗人疑其輸賄，遮奪之。巡撫趙可懷屬有司捕治。宗人持兵突入撫署，擊殺可懷。於是逮捕諸宗人，置重典者六人。禁錮閑住者四十五人。

秋七月，京師大雨雹。○八月，禮部侍郎郭正域罷。

正域發華奎行賄事，辭連沈一貫。華奎言：「正域，楚人，與臣素有仇。」於是給事中楊應文、御史錢夢皋等交章劾正域，陷親藩正域乞休去。

冬十一月，獲妖書。

先是侍郎呂坤嘗撰閨範圖說太監陳矩持進帝帝以
賜鄭貴妃妃重刻之二十六年秋或撰閨範圖說跋名
曰憂危竝議言坤書首載漢明德馬后出宮人進位中
宮意以頌妃而妃之刊刻實藉此爲奪嫡地妃兄國蔡
以給事中戴士衡嘗糾坤全椒知縣樊玉衡並糾貴妃
疑出自二人手言於帝帝重謫二人事遂寢至是續憂
危竝議復出朱賡於寓門外獲之其詞假鄭福成爲問
答鄭福成者謂鄭氏子福王當成也大略言帝立東宮
出於不得已他日必當更易其用朱賡爲內閣者以賡
更同音也詞極詭妄時皆謂之妖書帝大怒勅有司大
索奸人沈一貫以楚宗事銜郭正域又惡沈鯉相逼欲

因是傾之。給事中錢夢臯直指爲正域鯉所造遂發卒圍正域舟於楊村。捕僕隸乳媼十餘人御史康丕揚先後捕正域所善醫人沈令譽僧達觀等。雜治之竟無所得。最後錦衣衛獲順天生員皦生光。生光性險賊多脇取人財。又嘗爲妖詩傾戚里。疑書出其手遂下獄拷訊夢臯丕揚令引正域不從。光宗在東宮數語近侍曰何爲欲殺我好講官諸人聞之皆懼。帝意本不欲株連法司乃歸獄生光磔之正域始得歸。

二十二年夏四月朔日食。五月雷火焚長陵明樓。六月太白晝見。

沈一貫等以災異疊見疏請罷礦稅出畿內補缺員發

臣下章奏帝答以修省實政俟次第舉行一貫等又言
俟之爲言有何底極臣等非不欲俟而天下危亂恐有
不能俟者帝不省

秋七月大雨水

巳巳

三十三年夏五月雷震郊

鳳陽大風雨毀陵廟。左

都御史溫純罷

時大計京朝官純與吏部侍郎楊時喬主之沈一貫所
欲庇者鍾兆斗錢夢臯等皆在謫中疏入降旨切責盡
留被察科道官純力求去夢臯等誣純納賄給事中陳
嘉訓極論夢臯兆斗朋比爲奸請聽純歸以全大臣之
體帝予純致仕夢臯兆斗亦罷歸

秋九月京師地震。○冬十月濬朱旺口。

前年河決豐縣單縣決口亦潰魚臺濟寧間平地成湖。河臣李化龍上言自泃河旣成起直河至夏鎮與黃河隔絕山東直隸間河不能爲運河害獨朱旺口以上決單則單沼決曹則曹魚及豐沛徐邳魚碭皆命懸一錢堤防宜急會化龍以募去命工部侍郎曹時聘代之時聘乃大濬朱旺口凡役夫五十萬六閱月工竣自朱旺達小浮橋延袤百七十里渠廣丈厚河歸故道焉。

二十四年夏六月畿內蝗。○秋七月沈一貫沈鯉罷。

給事中陳嘉訓御史孫居相交章詆一貫奸貪一貫求去許之嘉訓居相亦貶秩一貫素有清望惟楚宗奴輩

京察三事與時論異故人多詆之鯉嘗侍帝東宮受知甚深及官禮部中官貴戚違例于請多引典禮裁抑及居政府守正不阿以壓於一貫志不盡行至是一貫去帝嫌鯉方鯁並令致仕。

冬十二月棄六堡。

初六堡既築生聚日繁至六萬四千餘戶至是李成梁以地孤懸難守與總督蹇達巡撫趙楫建議棄之盡徙居民於內地不從則以大軍驅迫之死者狼籍給事中宋一韓力言棄地非策熊廷弼亦以爲言帝卒用成梁議自是遼左藩籬盡撤。

三十五年春二月以于慎行李廷機葉向高爲東閣大學

士。○秋八月。彗星見。○冬十一月于慎行卒。

慎行明習典制。爲禮部尚書。諸大禮多所裁定。以請建儲。忤帝意。家居十餘年。召掌詹事。不至。入閣命下。再疏辭。不允。至京十有三日而卒。中外惜之。

蠻陷武定。

鳳氏世爲武定土知府。嘉靖中。上舍鳳朝文叛。伏誅。乃改流官授鳳歷爲土經歷。又以謀作亂死。土職盡絕。至是鳳阿克陰結會川諸蠻攻陷武定。連破旁近州縣。自立爲知府。巡撫陳用賓總兵沐勳以失事下獄。論死。明年九月賊始平。

三十六年春二月京師地震。○飭邊備。

是時蒙古喀爾喀諸部悉歸我

大清蘇遼總督塞達疏陳東方隱憂。止早為備。廷臣請亟罷礦稅以安人心。不省。尋命守臣嚴備邊。

夏六月。李成梁罷。○冬十一月。朱曆卒。○十二月。朶顏寇薊州。京師戒嚴。

朶顏長昂之子賴暈。與其從父蟒金潛入薊鎮。大掠河流口。叅將馬棟等不能禦。時援師所過。居民望見火光。驚為敵至。逃入京師者日數萬。九門盡閉。兵部尚書李化龍請以三十萬金補薊鎮缺餉。並修守備之具。而度支告匱。戶部請暫借內庫礦稅銀。限以歲月補還。帝難之。命發太僕寺馬價十萬。戶部銀十萬。昇之軍情稍

定敵以有備引去。

三十七年春二月。拱兔陷大勝堡。

先是。朮顏結黃台吉。謀犯喜峰口。總兵官杜松受總督王象乾指。潛搗黃台吉帳。以牽制。寇乃從中左所。夜馳拱兔營。掩殺百餘人。以大捷聞。兵備副使馬拯謂彼無故被勦。必復仇事。且叵測。至是果以五千人攻大勝堡。執守將耿尚仁。支解之。殺掠幾盡。復深入小凌河。二十里。官軍禦之。大敗。部議繫由杜松。令戴罪自効。松甚盡焚鎧仗。置兵事不問。乃勒還籍。

葉向高請發言官章疏不報。

時言路互相詆訐。帝心厭之。章悉留中。御史鄭繼芳

攻給事中王元翰左右二人者復相角不已向高請盡
下諸疏勅部院大臣評曲直罪其論議顛倒者二二人
以警其餘不報諸臣既無所見曲直益樹黨相攻

三十八年夏四月正陽門災

時京師久旱正陽門樓火給事中周曰庠疏言正陽城
樓與正殿相對義取富陽自萬歷二十年來大小臣工
莫見聖容朝夕左右不過宦官精明強毅之心日蝕月
消而人材邪正政事得失都置膜外昔年宮殿災業已
示譴迄今十餘年玩愒如初所謂恭已正南面者杳無
時日則何取於正陽之名爲哉願稍振刷勤庶政親百
官疏入不報

冬十一月朔日食

禮部右侍郎翁正春言。前兩歲食四月朔。純陽之月也。今食十一月朔。陽生之月也。豈非陽德有虧。是以上天譴告如此。日之食與更在一時。而皇上之寢興行祇在一念誠翻然轉移。太平盛業將綿萬載。疏入不報。

三十九年春二月巡撫鳳陽都御史李三才罷。

三才在淮久以折稅監得民心。屢加至戶部尚書。然頗通路遺結。納遍海內。輔臣缺建議者。請叅用外僚。意在三才。由是忌者曰。衆工部郎中邵輔忠。劾其貪僞險橫。御史徐兆魁。喬應甲。給事中王紹徽等。十餘人繼之。胡忻。黃子沐等交章論救。朝端聚訟數月。未已。顧憲成方

講學東林。貽葉向高孫丕揚盛稱三才廉直議者益譁三才力請罷去未幾兆魁劾東林黨人陰持計典自是諸講學者多不理於口

夏六月大水

南北兩畿及湖廣皆大水諸大吏請罷權稅以甦民命不省。

秋八月吏部侍郎王圖罷。

是年京察御史金明時以不職懼斥倡言要挾諸當事者主事素聚奎佐之俱爲孫丕揚劾罷其黨大譁又祭洒湯賓尹諭德顧天竣召號朋徒干預時政謂之宜崑黨以賓尹宣城人天竣崑山人也圖時兼掌翰林院而

祭酒例由掌院汪考賓尹屬王紹徽爲之請圖峻拒之
禡二人職紹徽及喬應甲皆外轉由是諸失意者力攻
圖圖遂引去時臺諫之勢積重不返有齊楚浙三黨之
名齊則元詩教周永春韓浚張延登爲首而燕人趙興
邦輩附之楚則官應震吳亮嗣田生金爲首而蜀人田
一甲徐紹吉輩附之浙則姚宗文劉廷元爲首而商周
祚毛一鷺過庭訓輩附之與賓尹輩並以攻東林排異
已爲事。

九月戶部尚書趙世卿上疏去位。

世卿饒心計在戶部酌劑羸縮軍國賴焉公主下嫁福
王出邸凡額外宣索世卿俱力爭楚王與宗人相訐世

卿嘗官楚府長史言王非僞與沈一貫合遂爲廷臣所惡論劾相繼世卿上疏乞罷出城候命踰年不報乃乘柴車去未幾吏部尚書孫丕揚亦拜疏歸

四十年夏五月朔日食○秋八月以刑部尚書趙煥兼吏部尚書

時曹署多空六卿惟煥一人又兼署兵部至是改署吏部兵部尚書李化龍卒召王象乾未至亦不除侍郎戶工禮三部止各一侍郎都察院自溫純罷去八年無正官六科止數人十三道皆以一人領數職在外巡按十餘年不得代督撫監司亦屢闕不補郡守缺付之五六文武大選急選官及四方教職積數千人以吏兵二科

家範彙編卷之三
缺掌印。不給牒。久滯都下。時攀執政與袁詵。煥累疏乞
除補。始除侍郎。四人既而考察命下。補科道六十餘人。
時稱盛事云。煥素有清望。於朝臣無所左右。顧雅不善
東林。諸黨人及附東林者咸起攻之。明年秋罷歸。

九月李廷機罷。

廷機性廉潔。然頗刻深。初入閣。廷臣爭論之。累疏乞休。
不允。出居僧寺。不視事。言者猶攻之不已。至是疏乞百
二十餘上。不得命。竟歸。

御撰資治通鑑綱目三編卷十七

起癸丑明神宗萬曆四十一年
年盡庚申明光宗泰昌元年凡八年

四十一年春三月加淮揚田賦

時江上有倭警需餉急鳳陽巡撫陳薦請加派銀十五萬兩有奇從之

詔卜失免襲封順義王

三十五年順義王捨力克死孫卜失免應嗣求婚於忠順夫人忠順拒之其所部素襲台吉五路台吉各不相下封號久未定至是卜失免始婚於忠順東西諸部長皆具狀爲請封忠順夫人旋卒詔封卜失免爲順義王然勢益衰不復能力制諸部矣

秋大水。

兩畿河南山東湖廣江西廣西俱大水。

八月以方從哲吳道南爲東閣大學士。

自朱賡卒李廷機以人言杜門久葉向高遂獨相向高臥病每卽家擬旨請增置閣臣章百餘上至是始命二人入閣時道南在籍踰年乃至。

四十二年春二月以鄭繼之爲吏部尙書。

趙煥罷以繼之代繼之楚人年八十餘毫而憤一聽楚黨意指凡與黨人異趣者貶斥殆盡大僚則中以拾遺善類爲空云。

慈聖皇太后李氏崩。

后性嚴明。萬歷初政。后保護之力居多。姜應麟以疏請建儲。被謫。太后因帝入侍。問故。帝奏對失旨。太后怒。帝惶恐伏地。儲位由是定。至是崩。諡孝定。

三月。福王常洵之國。

初。廷臣請王之藩者。數十百奏。不報。會錦衣百戶王曰乾。託奏貴妃內侍姜麗山等用厭勝術。詛咒皇太后皇太子。欲擁立福王。帝震怒。棄向高請速令福王之國。以息群喙。帝納之。尋又諭改期。向高封還手勅。力諫。帝不得已。始令就藩。歷年稅使礦使所進珍奇贏羨。悉以資之。賜莊田四萬頃。中州腴土不足。取山東湖廣田益之。王又奏乞淮鹽數千引。開市洛陽。中州舊食河東鹽。以

改食淮鹽河東引過不行。邊餉由此大絀。

釋楚宗幽禁諸人。

楚宗之獄。廷臣互有左右。歷數年。卒不能白。至是。禮部侍郎孫慎行力言。楚宗殺趙可懷。不得爲叛。乃稱太后遺詔釋之。

夏六月。葬孝定皇后於昭陵。○秋八月。葉向高罷。

向高以宿望居相位。每事執爭。效忠蓋帝心重之。而其言多格不用。所救正十二三而已。嘗疏言。今天下必亂。必危之道。蓋有數端。而災傷寇盜。物怪人妖。不與焉。廊廟空虛。一也。上下否隔。二也。士大夫好勝喜爭。三也。多藏厚積。必有悖出之釁。四也。風聲氣習。日趨日下。莫可

挽回五也。非陛下奮然振作，簡任老成，布列朝署，取
年廢弛政事，一舉新之，恐宗社之憂不在敵國外患，而
在廟堂之上也。帝不能用。向高累疏求去，帝輒慰之，
留向高復言。陛下欲用臣，則當行臣言。今章奏不發，人
僚不補，起廢不行，臣留何益？又言：今中外離心，輟輟
腋間，怨聲憤盈，禍機不測。而陛下務與群臣隔絕帷幄，
不得關其忠。六曹不得舉其職，舉天下無一可信之人，
而自以為神明之妙用。臣恐自古聖帝明王，無此法也。
帝俱不省。至是乞休疏四十餘上，詞極哀，始允其去。
四十二年春三月朔日食。夏五月，畿內山東旱。男子
張差持挺入慈慶宮伏誅。

太子居慈慶宮。有不知姓名男子持梃擊傷守門監人。前殿被執。太子以聞。命按問。御中劉廷元刑部郎中胡士相等先後鞫奏。但名張差。薊州人以積柴爲人所燒。氣憤發狂。詣京訴冤。法司遂以瘋顛具獄。時東宮雖入定。帝待之薄。中外方疑鄭貴妃與其弟國泰謀危太子。及差被執。舉朝驚駭。刑部主事王之案至獄中。脅令吐實。詞連內監劉成。龐保皆貴妃近侍也。於是廷臣交章上請。言禍生肘腋。急宜剪除。並寢不報。越數日。刑部集諸司會鞫。與之案所奏無異。朝廷巨請鞫治。戚保等窮究主使。給事中何士晉直攻國泰。且侵責鄭。初。奸人王曰乾上變言巫蠱事。辭已連成。至是復涉成。衛

心動。諭貴妃善爲計。貴妃寤乞哀。皇太子自明無他。帝令太子白之廷臣。太子亦以事連貴妃。大懼。請帝速具獄。毋株連帝。乃御慈寧宮。召方從哲、吳道南、暨文武大臣八。責以離間父子。因執太子手。謂諸臣曰：「此兒極孝。朕極愛惜。使朕有別意。何不早更置。又顧問太子有何語。與諸臣悉言無隱。」太子具言瘋顛之人。宜速決并責諸臣妄言。諸臣叩頭出。遂磔差於市。掠死成保。禁中帝不見群臣。二十有五年矣。至是特一出以釋群疑。且調劑貴妃太子。念其事似有迹。故不遽罪言者。未幾給事中徐紹吉、御史韓浚劾之。案妄生事端。遂削之。案籍調士晉外任。

丙辰

冬十月京師地震。

四十四年春兩畿山東河南大饑。

是歲陝西山西旱蝗江西廣東湖廣大水。

三月朔日食。夏六月天鼓鳴。

兵科給事中熊明遇疏言。入春以來天鼓兩鳴於晉地。流星晝隕於清豐。地震二十八天。火九石首。雨菽河內。女妖遼東。兵端吐火。卽春秋二百四十年間。未有稠於今日者。且山東大祲。人相食。黃河水稽天。兼以太白經天。輔星湛沒。熒惑襲月。金水愆行。或日光無芒。日月同暈。爲恒風爲枯旱。天譴愈深。而陛下所行皆誣天拂經之事。此誠禽息碎首賈生痛哭之時也。敢以八憂玉漸。

三無之說進。今內庫太實。外庫太虛。可憂一。餉臣乏餉。邊臣開邊。可憂二。套部圖土。插部覬賞。可憂三。黃河泛濫。運河膠淤。可憂四。齊苦荒天。楚苦索地。可憂五。鼎鉉不備。棟梁常掇。可憂六。群譁盈衢。訛言載道。可憂七。民喜亂寇。履倒置。可憂八。八憂未已。五漸繼之。太阿之柄。漸付中涓。魁壘之人。漸如隕籜。制科之法。漸成奸藪。武庫之器。漸至銷亡。商旅之途。漸至梗塞。五漸未已。三無繼之。匹夫可熒惑。天子小校。可濫邀絲綸。是朝廷無紀綱。渙默之守令。皆窮途揚粍之監司。多規避。是遠方無吏治。謹構之口。甚於戈戟。傾危之禍。慘於蘇張。是士大夫無入心。天下事可不寒心哉。

御批通鑑輯覽卷一百一十一
三
套虜犯延綏總兵官杜文煥破降之

時套虜號十萬然其衆分四十二枝多者二三千少不及千騎惟小失免之子吉能士馬雄諸部前年秋求封王爵邊臣格不以聞遂糾諸部入寇文煥屢擊敗之乃相繼納款

秋八月皇太子出閣講學

皇太子輟講已十有二年群臣諫疏凡數百上及是始命舉行然一講而輟後不復舉矣

九月兵部請治兵不報

前以孝定太后喪停操三年至是兵部上言大禮久竣當新戎壘以應秋氣不省

四

四十五年夏旱

自去冬無雪入春不雨至是大旱時災歉遍天下有司請賑率寢不報盜賊四起帝但勅群臣修省而已

秋七月朔日食○吳道南罷

道南遇事有操執通達政體頗負時望前年典會試舉子有以代倩獲第者湯賓尹嗾其黨交章論之給事中劉文炳御史張至發攻尤力肆口詆譏道南不能堪言臺諫劾閣臣職也二百年來有糾閣臣之言官無冒閣臣之言官臣辱國已甚請立罷黜帝爲諭文炳於外言官疏救文炳復詆道南道南益求去杜門踰年疏至二十七上帝猶慰留會母喪乃歸居二年卒

後漢書卷一百一十五
四十六年夏四月京城潦水赤○我

大清兵克撫順

守將王命印死之李永芳降總兵官張承應率師來援
分軍爲三據險自固莽師潰承應戰死將士死者萬人
諸堡皆陷時捕漢及西部皆擁衆入邊乘機邀賞羽書
日數十至中外戒嚴帝初頗憂懼章奏時下不數月泄
泄如故矣

日中有黑子○閏月起楊鎬經略遼東

初鎬巡撫遼東嘗乘虛襲殺秦寧部致寇屢入犯爲言
者劾罷至是以遼警廷議謂鎬熟諳邊事起兵部尙書
往經略

六月趙煥復爲吏部尙書。

鄭繼之罷去。給事中元詩教以煥爲鄉人。老而易制。力引煥代繼之年七十有七矣。比至。聽詩教指揮。由是素望益損。

京師地震。秋七月。我

天清兵克清河堡。

守將鄒儲賢張旆戰死。清河在四山之中。東距寬奠。南距灤陽。北距瀋陽。清河旣失。全遼震動。而諸路兵尙未出關。帝賜楊鎬尙方劍。得斬總兵以下官。鎬乃斬清河逃將陳大道高炫。徇軍中。至冬。四方援兵始集。

加天下田賦。

帝以遼左軍餉不敷。際貴州地磽。兼有苗變。不加外餘。省照萬歷六年會計錄。派定七百餘萬。頃得畝加三釐五毫。共加銀二百萬有奇。次年復加賦額至八百萬。時遼餉五百餘萬。軍心賴以粗安。而天下蕭然。民生困弊矣。

茂陵災。○冬十月。彗星見。

昆氏分。後十數日。犯太微。又三日。逼紫微垣。凡三十四日乃滅。

四十七年春正月。蚩尤旗見。長竟天。○三月。楊鎬帥師出塞。敗績。

帝以四方援遼兵大集。恐師老財匱。下廷議。方從哲與

兵部尚書黃嘉善。兵科給事中趙興邦等。發紅旗曰趣
鎬進兵。鎬乃於二月中出塞。分兵四道。令總兵官馬林
出開原。攻北。杜松出撫順。攻西。李如柏從鴉鶻關出。趣
清河。攻南。東南則以劉綎出寬奠。由涼馬甸出。後而以
朝鮮兵助之。號四十七萬。期三月二日會二道關進。進
天大雪。兵不前。師期洩。松欲立首功。先渡清河。進至二
道關。遇伏。戰歿。全軍盡覆。林率開原兵出三岔口。聞松
敗。結營自固。我

大清兵乘高奮擊。林大敗遁去。鎬聞急檄止。如柏綎兩軍如
柏遂不進。綎已深入三百里至深河。

大清兵擊之不動。已乃張松旗幟。被其衣甲以紿綎。既入營。

營中大亂。縋力戰死。惟如柏軍獲全。文武將吏前後死者三百一十餘人。喪軍士四萬八千五百餘人。亡失馬駝甲仗無算。敗書聞。京師大震。言官交章劾鎬逮下詔獄論死。

夏四月。遣給事中姚宗文關遼兵。六月。命熊廷弼經略遼東。

楊鎬既喪師。廷議以廷弼嘗按遼熟邊事。命代鎬經略。未出京。開原失。廷弼上言。遼左京師肩背。河東遼鎮腹心。開原又河東根本。欲保遼東。則開原必不可棄。敵未破開原時。北關朝鮮猶足爲腹背患。今已破開原。北關不敢不服。遣一介使朝鮮。不敢不從。旣無腹背憂。必合

東西之勢以交攻。然則遼瀋何可守也。乞速遣將備芻糧修器械毋窘臣用。毋緩臣期。毋中格以阻臣氣。毋旁撓以掣臣肘。毋獨遣臣以艱危。以致誤臣。誤遼兼誤國也。疏入。報允。甫出關。鐵嶺復失。瀋陽及諸城堡軍民一時盡竄遼陽。洵。廷弼兼程進督軍士造戰車治火器。濬濠繕城爲守禦計。法嚴。行數月。守備大固。

秋八月。廷臣伏文華門。請帝視朝。發章奏。不報。

時邊警日亟。方從哲請帝出御文華殿。召見群臣。面商戰守方略。吏部尙書趙煥率廷臣詣文華門。固請帝臨朝議政。抵暮。遣中官諭之退。煥等復上疏。且作危語曰。他日薊門蹂躪。敵人叩關。陛下能高枕深宮。稱疾却之。

卷之二十一

九

乎。帝深嘆焉。

庚申

四十八年春正月。朝鮮乞援。

是時我。

天

清兵既破北關。降蒙古宰賽等。進攻朝鮮。國王李瑄上疏。

乞援。帝降勅慰之。

庚申

夏四月。皇后王氏崩。秋七月。帝崩。

庚申

光宗貞皇帝泰昌元年。秋八月。太子常洛即位。罷天下。

礦稅及監稅中官。起用建言得罪諸臣。以史繼偕。沈灌。

為東閣大學士。

神宗末。廷推閣臣。給事中。元詩教等。以灌及繼偕名上。

疏。未發。至是。帝召用之。明年六月。灌至。十月。繼偕至。灌。

官翰林時授內侍書劉朝魏進忠皆其弟子既入閣
宿結二人奏言遼左用兵臣嘗募材官勇士二百餘請
募錦衣衛訓練詔從所請

帝有疾

初鄭貴妃侍神宗疾留居乾清宮及帝嗣位未移懽帝
以前福王事銜已進珠玉及美姬八人嗽帝知還侍李
氏最得帝寵因請立爲皇后選侍亦爲貴妃求封皇太
后帝力疾御門趣舉冊封禮方從哲卽以命禮部禮部
侍郎孫如游力爭事得寢時都下紛言貴妃使內侍崔
文昇進洩藥帝由此委頓群情疑駭外家王郭二戚晚
遍謁朝士泣懇宮禁危急狀言鄭李交甚固包藏禍心

於是給事中楊漣御史左光斗昌言於朝與吏部尚書周嘉謨以大義責貴妃兄子鄭養性趣貴妃移宮貴妃恐即移居慈寧漣遂劾文昇用藥無狀并及輔臣方從哲

以何宗彥劉一燝韓爌朱國祚並爲東閣大學士召葉向高復入閣

時宗彥國祚向高皆在籍明年六月宗彥國祚至十月向高至復爲首輔

帝召見方從哲等於乾清宮九月朔崩

帝疾甚召見閣臣從哲劉一燝韓爌尚書周嘉謨李汝華侍郎孫如游都御史張問達給事中楊漣等命封選

侍爲皇貴妃。選侍起皇長子出曰。欲封后。帝不應。群臣愕然。帝問有鴻臚官進藥者。安在。從哲曰。鴻臚寺丞。可灼。自云仙方。臣等未敢信。帝命宣可灼。至起和藥進。所謂紅丸者也。帝服訖。稱忠臣者再。諸臣退。可灼復進一丸。明日。帝崩。選侍與心腹閹魏進忠謀挾皇長子。自重。群臣入臨。爲閣人所格。漣厲聲責之。得入。臨如禮。一爆詰皇長子所在。群閣不應。一爆大言。誰敢匿新天子者。東宮作讀王安。八白選侍抱皇長子出及門。中官數輩追及。攬衣請還。漣呵退之。掖升輦。至文華殿。羣臣叩頭呼萬歲。還居慈慶宮。擇日登極。漣與左光斗等念皇長子無嫡母。生母選侍嘗邀封后。非可以冲主付託也。

於是議令選侍移宮。爭數日不決。從哲欲徐之。至登極前一日。一爆嬪邀從哲立宮門。請選侍。乃移居曦鸞宮。皇長子由校卽位。

廷議改明年爲天啟元年。光斗請以今年八月以前爲萬曆。以後爲泰昌。從之。時劉一燝、韓爌、周嘉謨等念內廷惟王安足倚引。與其事。安亦傾心向之。內閣吏部所奏請無不從。發內帑。抑近倖。擢拔賢才。中外欣然望治。

賜太監魏進忠世廕。封乳母客氏爲奉聖夫人。

進忠初爲帝母王才人典膳。因魏朝。以結王安。與乳媼客氏私。帝嗣位。進忠客氏並有寵。廕客氏子侯國興弟。

客光先及進忠兄釗俱錦衣千戶。進忠後改名忠賢。
罷熊廷弼以袁應泰經略遼東。

廷弼有膽畧。知兵。前按遼時。卽持守議爲經畧。主守益
堅。然性剛好。嫚罵。物情不甚附。御史顧慥馮三元張修
德給事中姚宗文魏應嘉等先後劾廷弼破壞遼疆。廷
弼憤甚。抗疏求罷。朝議以應泰代之。時蒙古諸部大饑。
多入塞乞食。應泰下令招降。處之遼瀋二城。優其日廩。
與民雜居。議者言收降過多。恐陰爲敵用。應泰卒以此
敗。

冬十月。葬定陵。○以孫如游爲東閣大學士。○御史賈繼
春削籍。

選侍移宮時。內監劉朝。因詔等盜內府金寶。下法司按治。群闕懼搆蜚語。言帝薄待先朝姬嬪。致選侍自裁。御史賈繼春。上書內閣。謂先帝主體未寒。遂不能保一姬女。帝諭群臣曰。選侍前因殿崩。聖母自度有罪。每使宮人竊伺。不令朕與聖母舊侍言。有輒捕去。朕之苦哀。外廷豈能盡悉。皇考賓天。大臣入宮哭臨。選侍阻朕。煖閣既出。復再三趣回。此諸臣所自觀者。繼春妄生謗議。理法安在。朕今停選侍封號。以慰聖母在天之靈。厚養選侍及皇八妹。以遵皇考之意。爾諸臣可以觀體朕心矣。已復屢旨詰責繼春。削籍去。

十二月。方從哲罷。

初光宗崩從哲擬遺旨賚李可灼銀幣已而改奪俸言
官多劾從哲徇庇罷歸明年孫愼行鄒元標等追論紅
丸斥從哲爲執逆從哲疏辨請削官階投四裔韓爌張
問達言進藥始末臣等其見當時事起倉卒非但從哲
未能止臣等亦未能止均有罪焉但從哲罰可灼太輕
無以慰皇考服中外宜從所請削去官階爲法任咎議
上可灼戍邊從哲亦罷歸

御換資治通鑑綱目三編卷十七

